



LE GOUVERNEMENT
DU GRAND-DUCHÉ DE LUXEMBOURG
Ministère de la Famille, des Solidarités,
du Vivre ensemble et de l'Accueil

Äntwert vum Minister fir Famill, Solidaritéit, Zesummeliwwen an Accueil, Max Hahn op déi dréngend parlamentaresch Fro n°1816 vum honorabelen Deputéierten Sven Clement iwwerExpulsiounen aus ONA-Strukturen.

Den Delai, deem am offizielle Courrier vum Nationale Büro fir Opmam (Office national de l'accueil – ONA) fir irrecevable oder deboutéiert Persounen virgesinn ass, fir d'Ënnerkonftsstrukturen ze verlossen, ass 8 Deeg a net 5 Deeg. An dësem Kader sief unzemierken, dass den Delai vun 8 Deeg, eng zousätzlech Toleranz vum ONA ass. Des weideren, wann de leschten Dag vum Delai op e Weekend oder e Feierdag fällt, gëtt dësen op den éischten Aarbechtsdag dono verluecht.

Allerdéngs huet déi concernéiert Persoun an der Realitéit net nëmmen 8 Deeg Zäit, mee op d'mannst 30 Deeg, fir d'Ënnerkonftsstruktur ze verlossen. Bei der Notification vun der finaler Entscheedung vum Refus oder vun der Irrecevabilitéit duerch d'Gericht, kritt déi concernéiert Persoun och matgedeelt, dass si 30 Deeg Zäit huet vir d'Land ze verlossen, respektiv hire Retour ze organiséieren.

Innerhalb vun deenen 30 Deeg gëtt déi concernéiert Persoun vun der Direction Générale de l'Immigration op e Rendez-vous convoquéiert, fir iwwer hiren Dossier administratif ze schwätzen an hire Retour an hiren Land ze organiséieren. Eréischt no dësem Rendez-vous kritt d'Persoun vum ONA e Courrier mat der Informatioun, dass si d'Struktur innerhalb vun 8 Deeg muss verlossen. Dësen Delai ass allerdéngs ëmmer am Respekt vun deenen 30 Deeg, déi si accordéiert krut, oder souguer nach dono, jee nodeems wéini de Rendez-vous op der Direction Générale de l'Immigration war.

Als Konsequenz ass den offiziellen Courrier vum ONA en allerleschte Rappel, d'Ënnerkonftsstrukturen vum ONA ze verlossen, nodeems den Delai vun 30 Deeg ofgelaf ass. D'Persoun gëtt also scho laang am Viraus informéiert, datt si d'Ënnerkonftsstruktur vum ONA an d'Land verlosse soll.

Generell sief drop higewisen, dass Leit deenen hir Demande de protection internationale a leschter Instanz, oft no jorelaange Prozeduren, vun engem Gericht ofgeleent gouf, keen Urecht méi op e Bett am ONA-Réseau hunn, wouopshin déi concernéiert Leit wéi uewe beschriwwen opgefuerdert ginn innerhalb vun 30 Deeg d'Land ze verlossen an hire Retour z'organiséieren. Dës Prozedur ass iwwer d'Joren onverännert. Nei ass par contre d'Schafe vun enger Maison de retour, fir deene betraffe Persounen eng Solutioun ze bidden, wa si sech fir e Retour decidéieren. Si kréien hei souwuel e Bett ugebuede wéi och en adequaten Encadrement social, fir si op hire Retour virzebereeden an en neie Projet an hirem Heemechtsland auszeschaffen, woubäi si och finanziell ënnerstëtzt ginn.

Dës Projet vum fräiwëllege Retour an der Reintegratioun am Heemechtsland, deem an Zesummenaarbecht mat der OIM (« Organisation Internationale des Migrations ») ëmgesaat gëtt, gesäit vir, dass déi betraffen Persounen an hirem Heemechtsland eng Ënnerstëtzung am Beräich vun der Reintegratioun kréien. Si ginn bei der Wunnengssich, bei der Sich no Aarbecht, bei der Aschreiwung a Formatiounen an/oder bei der Emsetzung vun enger „activité génératrice de revenus“ (AGR) ënnerstëtzt. D'OIM encadréiert déi Leit op der Plaz bis zu 9 Méint. Zousätzlech kréien déi concernéiert Persounen eng finanziell Hëllef déi maximal bis 3000€ pro Persoun oder 4500€ pro Famill virgesäit. Virum Départ kréien d'Persounen och konsular Hëllef fir déi néideg Reessdokumenter ze kréien an eng finanziell Hëllef vu bis zu 500€ déi hinnen fräi zur Verfügung stinn. Derbäi kënnt nach, dass d'OIM fir d'Transportkäschten (Zuch, Fligger) integral opkënnt.



Deemno ass et wichteg ze betounen, dass Leit deenen hir Demande de protection internationale a leschter Instanz no jorelaange Prozesser an Appeller ofgeleent ginn ass, Alternativen an eng Hellefstellung ugebueden kréien, fir e Retour an wërdeg Konditiounen kënnen ze realiséieren.

Am Kader vun der aktueller Diskussioun ronderëm d'Expulsioun vun enger Mamm mat zwee Kanner aus enger ONA-Struktur, ass ze soen, dass déi betraffe Famill direkt nees bis op Weideres e Bett am ONA-Réseau offréiert krut, wéi ech d'lescht Woch vun deem Fall a Kenntnis gesat gouf.

Zanter dem 1. Januar 2025 sinn den Informatiounen vum ONA no zwou Famillën mat Kanner opgefuerdert ginn, den ONA-Réseau ze verloossen: Déi eng Famill ass an d'Maison de retour gang, déi aner Famill befënnt sech bis op Weideres am ONA-Réseau.

Lëtzebuerg, den 23. Januar 2025

Minister fir Famill, Solidaritéit,
Zesummeliewen an Accueil

(s.) Max Hahn